

阿文成公年譜

阿文成公年譜卷七

受業

王

昶勸

盧蔭溥增補

第三孫那彥成恭纂

乾隆三十七年

七月初五日

公奏言達烏東西兩山梁均極險仄現於東山後
尋覓間道卽於一二日內進發雖軍糧未能克期
運到但機會可乘不敢因此稍有遲滯奏入

諭曰軍行糧餉不繼所關甚重朕因此益增繫念阿桂向

來遇事持重此次進攻必實有可進之機斷不致冒險
輕進現已嚴飭阿爾泰上緊趲運軍糧以資接濟朕惟
盼捷音速至耳

初十日

諭曰阿桂奏南路侍衛章京俱令與綠營之領兵官同住
所辦甚是侍衛章京等係派往勦賊之人一切攻勦情
形必須親駐其地詳細體察兵丁出力與否亦必朝夕
同處彼此相習方能調度得宜若平素俱在營盤附近
居住臨陣方領兵行走官兵何能合爲一心此必從前
桂林爲總督時將伊等賓客相待所以有此錯謬阿桂

既將伊等分發領隊著傳諭溫福等西路軍營亦卽照此辦理

公偕阿爾泰奏言臣等奏明於東山梁後尋覓間道卽於六月二十三日分兵三路從扎哇窠山前進至魯楊山麓見有木城三座石礮四座官兵乘其不備搶上山梁賊衆敗逃當將卡柵佔住次日官兵復進繞過山梁數道直抵魯楊山梁之下山形壁立並無路徑而懸崖上均有賊卡踞守臣等以駐兵籌辦時日多稽糧運不無難繼因卽撤回又防賊番乘勢尾隨一面設伏一面撤兵果有賊

番分路衝突前來經官兵奮勇截殺殲斃甚多並斃紅衣頭目一名賊衆潰散官兵按隊撤回現另探覓路徑再圖進取奏入

諭曰阿桂從東山梁進攻雖得有數卡殲戮賊番及其頭目兵氣稍覺奮揚但以路險山高不能采入旋卽撤回仍屬有名無實是該處形勢進取頗難據阿桂另摺奏稱昭通湖廣兵各三千名到日可期得力如果阿桂訪有僻路可繞過僧格宗前後夾擊添此新到之兵自屬甚善若不過漫爲籌畫何如仍遵前旨將續調及現有餘兵概行調往西路併勢進攻阿桂仍駐劄南路以綴

賊勢遇有瑕隙仍可相機進剿是南路坐收牽掣之功
西路實資多兵之助著傳諭阿桂速行妥議具奏

十五日

公奏言綽窩土司朋楚克拉布丹綽斯甲布土司
工噶諾爾布各遣頭人具稟言屢被金川荼毒懇
請剿滅除害並願派土兵協剿是金川罪孽貫盈
爲衆土司憤恨冀其速亡情事已可概見臣查西
山梁墨壟溝一帶雖極高峻若能相機搶佔既可
破賊番東山梁犄角之勢且可進搗僧格宗但非
乘間出奇一舉集事賊番必更增修嚴密再辦愈

爲費力現與鎮將及土弁等詳悉定議提兵迅進
再前日從魯陽山撤回時見山頭坡角賊番所種
零星稞麥漸就成熟卽令漢土官兵割取其餘踐
踏殆盡行差僧格宗賊寨之前並將麥田悉行焚燒
合並陳明奏入

諭曰阿桂此次辦理甚屬用心奮勉著加恩賞戴花翎至
綽斯甲布等差人投稟尤爲極好機會自當速籌進取
所有該處軍糧飭令阿爾泰卽行趕運並著文綬加緊
督催毋稍遲緩

二十日

公奏言查綽斯甲布爲進攻勒烏圍正路惟因一時糧運難繼不能多集官兵只可相機攻擊以爲牽掣金川之地至西山墨壟溝以外甲爾木山梁若能一舉搶佔則出隘得寬去卑就高建餓之勢旣據搽縱在我可以得利此番各省官兵內其得力者黔兵爲最川兵與甘兵次之陝兵又次之連次撥來南路者均係陝兵然多此二千名亦足以壯聲勢而供畱守現已飛調陝兵二千名兼程前來以資協剿奏入報

聞

二十二日

公奏言川省分路進兵軍糧最關緊要南路山多
路遠趨運尤屬不易現在阿爾泰所辦綽斯甲布
一路軍糧計及一月尙未運到若遲至秋後卽恐
風雪載路挽運更難仰懇

皇上天恩暫令劉秉恬先赴南路籌辦糧石於事更爲有
益奏入

諭曰前因川省軍糧緊要特命劉秉恬往西路鄂寶往南
路分投辦理今南路巡僻路長山巒陡險輓運較艱尤
當設法趕運劉秉恬平日頗能辦事著調赴南路上緊

籌辦阿爾泰著仍在南路幫全趕運其西路糧務卽著鄂寶辦理

二十七日

公奏言西路軍營以鄂克什爲正路而曾頭溝爲協剿之師南路軍營以卡了爲正路而緯斯甲布革布什咱爲協剿之師必須卡了一路軍威強盛則南路各土司方可藉以無恐且現在溫福一路搗小金川之東又有曾頭溝一路以據其北若卡了一路再有多兵搗其西南犄角之形旣成腹背受攻必難支禦如將南路調撥所餘及續調未到

官兵歸併西路約咱一帶止爲駐守之計則是名爲三路其實僅有兩路賊番窺見南路力單勢必撤其精銳潛赴曾頭溝鄂克什等處據險固守恐西路亦未必卽能奏功揆之全局似爲無益至南路軍糧遲悞究因辦理不善所致今旣命文綬總督四川復派大臣伙助從此悉心料理糧儲自可無乏謹將實在情形從長熟計據實復奏奏入

諭曰阿桂覆奏南路之兵不宜分駐西路所奏甚是所有南路節次調派之兵應仍歸阿桂統領妥辦昨據溫福議將第五次調赴南路之陝兵二千改赴西路如現在

未赴西路卽令其仍歸南路備用而以續調之湖廣兵二千調往西路若前項陝兵已赴西路軍營卽將湖廣之二千兵調赴南路著傳諭溫福阿桂酌量檄調並諭令陳輝祖知之

又奉

旨阿桂之子阿彌達著加恩在尙虞處拜唐阿上行走

八月初七日

公奏言甲爾木山梁逼近金川爲進取僧格宗要路由墨壟溝前進山形雖險一至山頂道路尙寬自前次失利後賊番方以官兵不復從此取道正

可因其驕怠迅圖進取臣商定後卽派侍衛鎮將
等於各處隘口分防內酌撤出滿漢屯土兵練派
令明亮同副都統永平博靈阿侍衛德赫布和隆
武烏爾圖納遜總兵宋元俊及各侍衛章京將備
分隊帶領潛赴墨壘溝齊集二十一日進至羣崢
地方賊番瞭望不及之地稍爲歇息是夜月出後
土兵在前引路按隊進發官兵魚貫而登二十二
日子刻將近賊卡大霧彌漫乘其不備騰撲入卡
賊衆措手不及紛紛潰竄遂將第一道山梁及各
卡佔據官兵乘勝爭先所向披靡此一日間且戰

且前連搶山梁三道攻克石卡二十餘座石礮四
座山峯木柵一座所至殲賊多人其帶傷逃去並
墜落崖谷者不計外殺死頭目一名並搶獲火藥
刀矛器具甚多官兵隨又帶同巴旺布拉克底土
兵別從深嘉卜一路搶上山峯將路通金川之格
魯克古地方佔住修立營盤扼其來路查甲爾木
山梁前可俯視僧格宗東可下壓達烏今格魯克
古已爲官兵據定則金川賊衆來援路途紆曲勢
多不便若一面佔守山梁一面直取僧格宗諒達
烏前敵之賊可以不攻自潰奏入

諭曰阿桂奏覓間攻勦甲爾木山梁並已堵截通金川要路所辦甚合機宜具見實心經理阿桂著授爲內大臣在事將弁均屬奮勉出力併著交部議叙

八月十六日

公奏言甲爾木山梁迤北尙有賊番礮卡數座經明亮烏爾圖納遜直上攻撲接打四五次殺死金川克舟九寨大頭人一名並殲賊百餘因山上鎗石抵禦甚急未能撲取加上山梁地極高寒連日雨雪風雹兵丁僵凍甚多火藥口糧亦俱沾濕久駐實爲無益明亮等已將官兵撤回

臣

查明亮等未

經請示輒將已得甲爾木山梁退回不守實屬非
是應請將明亮降爲二等侍衛烏爾圖納遜降爲
四等侍衛以示懲儆臣現將在事將弁兵丁分別
懲叅外仍卽督率官兵分路並進務期一舉克復
以慰

聖懷奏入

諭曰阿桂奏官兵因風雪雨雹氣候寒冷將已得之甲爾
木山梁退回不守現今七月下旬卽使雨雹交作何至
頓改寒暄此必係緣營懼怯駕詞撤退明亮等若於其
時詢明倡議之二三人駢誅示衆軍心自定乃見不及

謂之失計但在阿桂權宜酌辦則可將領以下不得援此藉口也再官兵退回正恐繼進不易如其地難以急圖采入又當於綽斯甲布一帶分途並進以爲牽掣金川之計總之軍行機要務在隨時斟酌合宜著傳諭阿桂就現在情形悉心籌畫具奏以慰懸念

二十七日

公奏言據綽斯甲布土司稟稱金川派兵圍佔丹壩官寨丹壩土婦和爾郭求援已發兵往助臣以丹壩附近會頭溝當卽行知董天弼前往駐防並咨明溫福就近督辦惟是金川爲小金川死力拒

守名爲幫助實已并吞今當分兵先攻金川庶可
堅各土司歸順之心且使賊番撤回自衛則小金
川失恃采入不難是綽斯甲布一路官兵實難姑
待臣合宋元俊尅日起程而宋元俊現請添兵應
俟糧運稍充續調兵到再行酌量撥往奏入

諭曰綽斯甲布一聞丹壩告急發兵往助實屬恭順著阿
桂酌加獎賞以示鼓勵計賊番到丹壩地方較董天弼
進兵之期尙早一日賊近我遠誠恐緩不及事未知董
天弼辦理若何至宋元俊帶兵往綽斯甲布既可得其
駕馭之力兼可控扼金川相機襲擊該鎮現請添兵自

應酌量派給以厚兵力今已飛諭滇楚等兵馳赴南路
阿桂將應派綽斯甲布之兵先檄知帶兵人員卽由打
箭壚徑往

九月初二日

公奏言第五次陝兵二千內一千二百餘名已赴
西路其至南路達烏者僅七百餘名第六次陝兵
一千因西路尙在需兵仍飭將備帶赴西路至南
路官兵除派往綽斯甲布及革布什咱共八千名
外兵力本單今蒙

皇上合將湖廣後起兵二千名卽往南路加以滇楚各兵

到日自可迅圖采入近據脫出之屯兵供稱索諾木派勒烏圍以上賊番禦西路噶拉依以上賊番禦南路是賊黨鴟張今日之辦小金川實已與辦金川無異但綽斯甲布之土司必俟官兵前進方肯多派土兵助勦而南路各土司又必俟綽斯甲布協助方能實力奮攻是此路進兵更難稍緩近因宋元俊染患時疫是以稍遲數日俟其病體稍愈糧運充裕立即進發奏入

諭曰前阿桂奏官兵自甲爾木山梁退回俟有續調兵到即行前進佔據之語續據雲南湖廣督撫奏聞官兵入

川日期阿桂處應有帶兵大員稟報何以今日摺內並未奏到又阿桂另摺奏稱綽斯甲布一路進兵更難稍緩但宋元俊染患時疫未能迅速進兵阿桂宜將應派之兵派員先行帶往並諭宋元俊在後繼進方屬妥協設或宋元俊病難速痊又當須另籌接代之人不可因循姑待坐失事機且據金川脫出屯兵供詞索諾木將所有賊衆盡派助小金川支禦西南兩路則境內自必空虛此時若由綽斯甲布乘間直入或將索諾木勦擒全局竟可不勞而定自是極好機會惜乎進兵稍遲不能先發制人耳至綽斯甲布之兵由革布什咱挑撥前

往革布什咱甫經收服其地爲章谷後路所有派駐之兵不宜過於抽撥今現調之昭通及湖廣兵六千名早入川境阿桂酌調數千選員帶赴綽斯甲布較之專調革布什咱之兵更爲得力阿桂當就現在情形通盤籌酌務出萬全

十三日

公奏言據駐綽斯甲布之副將李天佑稟稱該土司已選土兵四千并指引進兵之路一由日旁山攻勒烏圍上首一由俄坡攻勒烏圍中間一由牧畜溝攻噶拉依但現在兵力不敷分撥應先酌要

路進攻臣一面派將領帶兵前赴綽斯甲布一面
飭遊擊馬應詔同李天佑駕馭該土司督兵前進

奏入

諭曰綽斯甲布土司盼望官兵速往自屬實情其分路多
兵之說亦必應如此辦理現在昭通湖廣頭起官兵陸
續可抵成都著傳諭阿桂卽速酌調派員帶領前進李
天佑原係副將候補之員今現出有陝西洮岷協副將
員缺卽令李天佑補授馬應詔係候補遊擊著加恩以
叅將用伊等自當愈加感奮但二人究屬偏裨於統領
大兵不足以壯聲威舒常原係領隊大臣曾經帶兵閱

歷現在西路帶兵之人尙多卽令舒常迅速起程遄赴
綽斯甲布領兵進剿並諭阿桂令音濟圖烏爾圖納遜
二人陸續帶兵往綽斯甲布隨同舒常前進

二十七日

公奏言小金川賊番屢在卡外喊求投稟臣卽令

其進營叩見據頭人薩斯嘉與通事拉旺并賊番

十三人一同到營投遞澤旺稟詞臣悉心譯看仍

以鄂克什咒伊父子報讎爲詞實爲狂悖可恨臣

查西南兩路併剿小金川自應早行殄滅實因金

川代爲據守以肆其負隅近日又因莊稼新收尙

復稍延殘喘但訊據該番等所供現收稞麥僅止
二三月口糧及番衆七八千人死亡過半老弱婦
女逃至金川無從討吃又多餓死等語自屬實在
情形僧格桑此際見大兵雲集指日滅亡雖將鄂
克什退還而西路官兵尙無歇手之意因復遣人
來赴南路藉以窺探情形如其稍事優容賊酋必
復欺誑番人以爲現與大兵議降尅日卽當完事
噉使暫爲死守而巴旺布拉克底各土司見賊番
持檄往來或疑

天朝仍有納降之局必至轉多觀望自宜拘其番衆絕

其回諭以固羣心而褫賊魄查此內薩斯嘉尙肯
傾吐實情其拉旺從前曾至成都甚爲狡猾均已
委員迅速解京餘番陸續解省監禁

公又奏言達烏前敵一帶峻險異常但官兵一從
墨壟溝進發佔據山梁則前敵亦當合力攻取以
分賊勢臣合巴旺布拉克底土弁密爲踣探據稱
前敵東山梁賊番石卡木柵靠山臨河占盡地勢
惟西山脚壁立水中賊度官兵必不能往若得皮
船百十隻於黑夜中泝流而上潛至西山之麓乘
其不備可以潛登臣已派將備等趕造皮船現得

五六十隻計造竣之後滇兵正可全到踣探亦得
確實至期籌辦一面從甲爾木山梁衝壓一面乘
夜渡河攻擊諒可得手其綽斯甲布一路現在調
赴之兵及李天佑原駐之兵已有三千又有土兵
數千聲勢不爲不壯尙須大員彈壓查襄陽鎮總
兵馬彪前在西路出兵頗有經歷人亦老成應令
其統領此路官兵仍令李天佑馬應詔幫同商辦
番情自於軍務有益其原調各起楚兵頭起尙未
出打箭爐臣已飛飭帶兵將領徑由喀勒塔爾取
道丹東迅往綽斯甲布均奏入

阿台及公年計卷一
諭曰阿桂奏賊番投稟一節所辦俱是薩斯嘉拉旺二犯
已經解京應知會沿途小心管押餘如桑哈爾拉布克
格宗阿台四犯供詞較多著一併解京備訊至此時續
調滇楚官兵俱應陸續到營今日據劉秉恬奏達烏軍
營及綽斯甲布等處軍糧現在源源接濟是軍糧均已
應手現今僧格桑退守路頂宗境地愈蹙人民乏食正
當乘此機會兩路夾攻則甲爾木一路之兵此時更不
宜再緩著傳諭阿桂上緊籌辦朕惟佇盼捷音也

十月初七日

公奏言據辦理糧務知府盛英稟有督標新兵林

奇投至資隆卡轉送到營供稱在西路南山打仗
被掠索諾木令將稟帖帶出內有霍爾章谷德爾
格忒各土司番民相安居住並無別事之語臣於
八月間因綽斯甲布番民將霍爾章谷運送軍糧
烏拉掠去隨令副將李天佑等曉諭綽會追出給
還至金川賊衆前在革布什咱之渥賭地方搶劫
德爾格忒土兵驟馬經臣嚴飭該處將備偵探踪
跡卽時擒戮今賊會肆行不法轉以並無干犯情
事希圖掩飾且欲令內地疑心各土司使其不肯
盡心出力又據布拉克底土舍安多爾遣其頭目

稟稱訪得金川番人云有漢官二人在噶拉依若
送出求降將軍等不及隄防我等搶殺可以得利
等語臣現飭將備等密爲預備倘賊番稍有舉動
即可奮擊殲戮再臣奏明過河潛往西山襲擊現
已陸續成造皮船其應搭浮橋並已預備木植板
片以資應用至甲爾木山梁一路亦均部署俟巴
旺等頭人確探道路到日卽督官兵進攻奏入

諭曰阿桂奏索諾木具稟合搶去綠營兵林奇賈送到營
索諾木負恩黨逆抗拒王師罪大惡極實不可不併力
剪除今綽斯甲布一路雖云牽綴賊勢若能相機直入

擒獲索諾木則小金川必更易於剿滅現在派往綽斯
甲布之兵已有六千餘名軍糧又可源源接濟阿桂卽
應督催李天佑駕馭該土司迅速進兵至阿桂奏綽斯
甲布番民將霍爾章谷運送軍糧烏拉搶去一節雖據
稱曉諭綽斯甲布土司全數追出但該土司旣恭順隨
征不應聽所屬番人妄爲不法亦當使其稍知儆懼從
來撫馭邊夷總宜德威並用若專事姑息必致爲其所
輕阿桂尙屬曉事不可不知此意又據奏布拉克底頭
目赴稟金川賊酋欲將所畱漢官送出求降乘便搶掠
等語今賊儒雖已送還寧祿尙畱賊寨若賊酋果將寧

祿送出或出其不意發兵勦擊多殺賊人亦可合賊會
喪膽

公又奏言行軍原可因糧於敵但番境山多地少
收穫無多每次攻得礮卡所獲賊番口糧爲數無
幾土境內亦無可購買而綽斯甲布一路官兵久
當進發臣屢諭李天佑馬應詔等可令官兵裹帶
者自行裹帶可僱用番夫背運者設法僱覓應用
奏入報

聞

公又奏言叅將常泰所帶川陝兵二千五百名於

九月二十三等日前抵木池楚兵三千名內頭
二起已出打箭爐十九等日行抵喀勒塔爾後起
亦卽陸續前進臣於二十二日派令侍衛蒙固爾
烏爾圖納遜伊爾哈納章京三通保前赴綽斯甲
布分領官兵臣以此路爲將來接辦金川之局檄
令總兵馬彪馳赴大營詳悉指示該鎮於二十五
日自達烏起程由吉地丹東一路趕上楚兵帶赴
木池總統進勦再吉地一路官兵經臣令汪騰龍
統領復於二十三日令副都統職銜音吉圖侍衛
普濟保阿坦保前往分領該處未設糧站之先所

需兵糧卽令汪騰龍等設法料理一面行知文毅
劉秉恬速飭糧員籌辦至進兵後文報甚關緊要
自丹東至木池現經議設七站其中有逼近金川
賊人出沒之地並飭將弁督兵嚴防奏入報

聞

公又奏言奉

諭以李天佑馬應詔究係偏裨因令舒常爲領隊大臣前
赴綽斯甲布竊查北路進兵臣已奏派馬彪前往
統領但舒常滿洲領隊大臣若統轄官兵令馬彪
協助更爲得力舒常從西路赴綽斯甲布仍須由

成都出打箭鑪道路紆回尙需時日此時正當駕馭土司發兵李天佑等若聞舒常前來未免遲疑觀望謹將

諭旨暫爲存貯仍飭伊等上緊辦理俟舒常將抵綽斯甲布時行令遵照奏入

上嘉之

十四日

公奏言臣審度地勢除酌留各卡隘防範後路官兵外甲爾木山梁一路派漢土兵八千餘名作爲正路仍令明亮統領其墨壘溝迤東有泥壘一處

派兵千名令總兵伊常阿率領間道前往以綴賊勢至達烏大營留兵千餘名臣親身督率由正面攻擊定於十月初七日黎明登山攻取各處碉卡

奏入

上嘉之

公又奏言據達烏前敵將弁報稱小金川送出川兵鄧文煥帶有賊稟到營供係本年四月內隨薛琮打仗被留臣閱賊番稟詞有悔罪乞

恩曾經叩請哈圖興海蘭察等轉求將軍在

大皇帝前代奏之語是賊番或以力極勢窮故爲搖尾乞

憐邛或暫緩此路進兵以便專力抵拒別路均未
可定吉地官兵現已定議進攻金川之甲爾壘壩
綽斯甲布一路之兵又經陸續前進金川難以再
行助惡而達烏一路復由甲爾木山梁等處分兵
進剿賊番諒必更爲惶遽似宜將計就計誘其自
來如果賊酋父子同詣軍門固可設法擒獲卽使
投稟專爲緩兵得此回諭亦必妄意官兵暫停進
發稍踈預備則乘隙奮攻尤易得手臣已酌寫檄
諭令侍衛等監看土兵傳令賊番領去奏入

諭曰阿桂給與小金川回檄欲誘逆酋自來併奠因此拒

守稍疎以資乘隙進攻之益固亦一策但逆會詭詐未必肯憑阿桂一言自投羅網且恐逆會假親來之說以誘我領兵大臣及將佐等出營逞其奸惡阿桂等惟應布置掩擒或併相機勦殺勿稍疎懈至逆會求降乞命尤當付之不聞非但價格桑不可輕宥即索諾木亦罪無可寬豈有費如許兵力仍以姑息了事復貽後患之理溫福阿桂等諒必能深體朕意

公又奏言綽斯甲布革布什咱兩路均可進擄金川賊境以掣助惡之勢而革布什咱之吉地距金川之甲爾壘壩止有三站如能攻取甲爾壘壩則

已據金川要隘不但由此可以進攻正地且各處
防守之兵均可量爲撤出以資進剿而緯斯甲布
見革布什咱土兵先進亦必迅速圖攻現在附近
吉地之漢土官兵令參將鄭國卿楊發育管領由
格爾格堡前進其附近丹東渥睹之兵汪騰龍與
音吉圖普濟保阿坦保等管領由拉古鄂前進均
於十月初三日啓行至由吉地抵甲爾壘壩一路
軍糧經臣以一時不及安站酌僱革布什咱番民
暫爲負運並據汪騰龍稟報駕馭頭目派出番夫
百名又於余科土司地方調牛三百頭以供輓運

奏入

上嘉之

二十一日

公奏言甲爾木山梁表延數十里其間有突起高峯數處其第四第五兩峯尤爲險峻如能奪此兩峯則迤南一帶山峯礮卡皆出其下臣與明亮定議於十月初四日明亮自達烏起程至墨壘溝次日至羣崢又次日至山根雨雪竟夜及曉雪尙未止明亮等令官兵於林木深密處潛伏並分兵四路初八日黎明攀崖前進其時雪深二三尺不等

至午一齊上嶺雨雪旋止侍衛綏庫攻第五峯繞
出賊後參領佛爾格訥復橫截於第四峯第五峯
之中賊顧此失彼無所措手我兵奮擊痛殲賊衆
內有紅衣賊目三名此次攻得木城一座礮卡二
十餘座第四峯及第五峯石城俱經攻克而格魯
克古復經侍衛德赫布攻得據守奏入

諭曰阿桂奏攻得甲爾木山梁一摺我兵旣據最高峯頂
自上而下其勢較易若卽出達烏之前直壓賊番所守
要隘則與阿桂處官兵兩路夾擊更無難乘間攻克再
現在我兵所據山峯似已抄在阿桂對敵賊寨之上卽

當設法截賊後路斷其糧食火藥使力不能支必將自潰而我兵應需口糧軍火之資務宜熟籌卽速繼運毋蹈前轍若皮船一節原屬攻其無備出奇制勝之計但黑夜渡河亦須事出萬全慎勿冒險輕進至官兵議叙之案祇應將此次實在出力人等造冊報部俾有功者益知奮勉其餘亦可藉以激勵將來兩路有應議叙者均照此辦理

公又奏言官兵進攻甲爾壟壩必由甲魯經過甲魯之前復有東西山梁對峙實爲金川後路咽喉據音吉圖汪騰龍等稟稱十月初七日帶兵上東

西兩山梁並由中路山溝分進賊衆驚潰大兵三面會合直趨甲魯至初九日攻克賊礮但由甲魯過河三里卽係往正地山口爲進攻甲爾壘壩必經之地此處尙有賊番礮柵現據音吉圖汪騰龍等督兵攻擊奏入

上嘉之

二十四日

公奏言甲爾木第五峯之南有四峯相連地名真登梅列每峯各有賊礮官兵必須下至山坳向上仰攻十月初十日明亮督兵攀崖而上三面衝擊

殺賊甚多其泥壘一路伊常阿於初九日帶兵至
大山之中直前攻撲並分兵三路將各石卡克取

奏入

諭曰前據阿桂奏甲爾木之第四第五峯地尤險要如能
奪此兩峯則迤南一帶山峯礮卡皆出其下兩峯卽經
明亮攻得何以此次進攻直登梅列賊礮我軍尙須下
至山坳復向上仰攻且此兩峯旣屬險隘自可截賊後
路其糧食火藥復從何路運送乎至明亮伊常阿分路
進攻賊番自必難於兼顧阿桂所辦皮船又已告竣若
潛師速往出其不意可冀得手何至今尙遲回觀望並

著阿桂據實覆奏

二十九日

公奏言綽斯甲布土司稟稱乾隆三十五年噶爾瑪木魯宗被三雜谷佔據巴朗索被金川佔據今巴朗索頭人帶有一百數十戶願歸舊主懇差官員同去等語查從前平定雜谷蒼旺之時經總督策楞等將噶爾瑪木魯宗巴朗索賞給綽斯甲布土司其後金川指使從噶克侵取噶爾瑪木魯宗而自取巴朗索今大兵從甲爾壘壩俄坡兩路進攻金川巴朗索頭人請歸故主自可乘便招致以

弱賊勢但從噶克土司現亦派出土兵在曾頭溝
一路助剿巴朗索一處與從噶克稍有干涉轉恐
心生疑貳臣巴飛札李天佑等查明辦理不得冒
昧貽悞並札知舒常令其就近指示妥辦奏入

諭曰阿桂奏巴朗索原係賞給綽斯甲布地方其頭人復
情願歸還自當聽從其便至其地爲金川自取與從噶
克無關似可毋庸顧計而阿桂摺稱從噶克倘稍有干
涉恐致心生疑貳亦屬詳慎之意著舒常及李天佑等
傳諭綽斯甲布土司以此地照舊歸還自爲順理其中
或有境壤相隔俟平定兩金川後徹底清查如巴朗索

與從噶克有涉原可於攻得金川地內酌量地界人戶
與巴朗索相仿者另行賞給但須奮力從征或較此所
得尙多亦未可定

公又奏言明亮進攻真登梅列賊番拒守四峯其
上礮卡以次排列而最北一礮之下有山脚一道
賊番築有二礮從僧克宗一帶運送口糧必經由
其下繞至後面方可前進十月十二日明亮派兵
往攻賊卽棄礮竄走旋將二礮佔據復令官兵向
下連築卡座以斷賊番來路奏入

諭曰此舉乃斷其後路最要策也

十一月初七日

公奏言明亮進攻真登梅列所取山脚石礮其傍
有小山一座上有石卡明亮於十月十八日派兵
於山溝左右潛伏復派官兵直攻小山石卡各處
賊衆分路來援我兵佯爲撤退賊衆追至山溝伏
兵並起而撤退之兵復還奮擊殲戮賊衆內大頭
人二名其一爲金川噶拉衣頭人愛石忻臣查前
敵兩峯相接之處地名翁古爾壘賊番於此悉力
拒守現令官兵畧爲休息偵探道路情形以期采
入奏入

諭曰明亮此次帶兵甚屬勇往計畫亦爲得當阿桂當傳
諭令其益加努力以冀勉副酬勛至伊常阿由泥壘進
兵何以尙無信息而阿桂在達烏亦未見有寸進卽以
堅礪非可卽取亦豈容過於遲疑坐待現在溫福等已
將抵明郭宗阿桂若卽能克僧格宗則兩路夾擊可蕪
小金川之局著傳諭阿桂將現在進剿情形迅速覆奏

十三日

公奏言查官兵自佔奪格魯克古以來已據金川
賊來正路所有運送口糧之賊連日鎗礮共斃十
六七名久不敢於日間行走但賊番所據四峯礪

卡俱極陡險若僅恃直前攻撲不無多傷兵力自

應繞截來路始爲要策臣令土兵等密探四峯之

東可從山坳一帶繞近前敵惟是賊番鬼蜮伎倆

其行走不必盡由徑路凡屬崖箐中間畧可措足

之地卽能潛行出入若於此繞道圍攻必將賊番

可以衝突抄截之處節節分兵駐守而正對賊番

高峯碉卡之各營盤亦必嚴加防範今明亮等趕

造大礮一俟鑄就一面轟擊對面賊碉一面於緊

要處所添修石卡卽可撤出官兵以爲進攻之用

至達烏前敵臣擬黑夜渡河襲擊西山陡壁上賊

礪原屬冒險出奇之計但賊番未必不恃其山勢
陡削直插河流揣度官兵無由前往因而防守稍
疎臣總於數日內督兵進取以期與山梁上官兵
兩相接應速破險隘奏入報

聞

十七日

公奏言臣前此紮造皮船擬於黑夜渡河襲取西
山陡壁上賊番礪卡以期壓破前敵但察看情形
西面山崖直插河流其上本無路徑惟踰看山巖
凹凸之間有三處畧可爬越而登其上均有賊番

礪卡白日斷難措手

臣

連日體察賊勢於十一月

初三日分撥漢土官兵於黃昏後先將預備皮船
橋料潛運渡口卽於是夜分撥官兵搭橋陸續渡
河至初四日卯刻千總劉世勳帶領第一隊屯兵
繞至西山最高石卡上首撲進奮擊將西山頂佔
據把總王興邦帶領第二隊巴旺布拉克底土兵
將山半各礪卡攻得第三隊明正嚕密土兵復將
沿河山根各卡奪據其時東面山下總兵王萬邦
章京圖欽保等各領黔陝官兵拔開木柵並將木
城石礪攻破計東面之翁古爾壘西面之布喇克

尼德古及紐寨各地方均於巳刻以前攻克守備
崔文傑督催土兵及遊擊劉輝祖等帶昭通等兵
於攻得西山碉卡後越過山溝攻得石卡其下尙
有雍德里官寨一所臣於是時派侍衛將領等帶
領楚兵於西面一帶山梁分布據守卽督勵官兵
將雍德里三面圍攻至次日早攻破又得永梅尼
爾瑪等碉座此次共奪得大木城一座碉寨一百
餘間石卡五十餘座臣查東西兩山懸崖壁立下
逼奔湍各弁員等於碉卡林立中蟻附奮攻其前
敵木城又極堅固賊於城外挖掘深溝松籤密布

溝外將士創鬆使攻撲者易於踏陷木城內復築石牆牆內石礮四座互相援助官兵等俱能鼓勇先登迅時攻破實爲勇銳臣現將攻開前敵緣由飛行明亮令其迅速夾攻以期及早會合臣卽移營翁古爾壘密籌進取奏入

諭曰此次阿桂實心籌畫調度有方並在事出力之將弁兵練均著交部議叙

又

諭曰阿桂之子拜唐阿阿彌達著加恩授爲藍翎侍衛

又

諭日前以阿桂攻克甲爾木山梁賞給內大臣銜隨據具
奏懇辭因諭令俟攻得僧格宗卽傳旨謝恩今阿桂如
此勇往卽著在軍營傳旨奏謝如能徑取僧格宗掃穴
擒渠自當再頒酬庸渥典至官兵已得翁古爾壘隘口
正賊番破膽之時且據所獲達爾結供稱距僧格宗不
遠有噶察地方聞僧格桑尙欲調兵拒守等語阿桂若
及其守拒未定迅速勦擊自易爲力惟僧格桑勢已窮
蹙亟宜畱心訪察斷其潛通金川之路倘逆酋逃往金
川卽應督兵與索諾木一併勦擒不得僅向索取現今
另降諭旨詳悉傳示兩路遵照妥辦再我兵攻得翁古

爾壘東西兩面山梁此等要隘得之頗屬不易其間路徑叢雜並當設法堵禦毋爲賊所竊佔而我兵所過後路更須加意防範俾糧運接續通行賊番不能在後抄截庶爲萬全

二十二日

公奏言本月初六日據守備崔文傑報稱官兵進至得里又進至日寨又進至札覺木將各碉寨攻克又據守備馬廷亮范玉先報稱順河進攻佔據山頂碉寨復於是夜攻得石卡又於初七日據總兵伊常阿報稱督兵潛上岳魯山梁將各卡柵奪

取其甲爾木一帶據明亮報稱於初七日子刻令
綏庫喜當阿劉倬等潛攻真登梅列高峯大礮各
隊官兵同時撲上賊番彼此不能相顧棄礮潰竄
退守金川之當噶爾拉遂將各礮卡及石房佔據
又侍衛德赫布守備李植善於初七日黎明將格
魯克古後山頂大小卡座亦皆奪取現在整頓兵
力進攻扎爾瑪等處礮卡一面勦取翁古爾壘前
面東山賊卡即可從納圖納扎木等處直壓至僧
格宗

公又奏據音吉圖稟稱明正及革布什咱番民頗

肯向前打仗其餘土兵雖嚴令督催亦不向前等語經臣諭以驅使番民當有駕馭之術若專務督催轉失其心汪騰龍雖染綠營習氣但南路軍營求一畧識番情者絕不可得是以暫令汪騰龍統兵臣仍隨時指示策勵以期無悞

公又奏言據音吉圖汪騰龍稟稱革布什咱頭人磋結告稱正地爲金川產糧之所現在甲爾壟壩與正地山口礮寨賊番口糧皆取給於此甲魯之西約十里許地名格津可以越山繞道至正地之嘉資山此係金川往正地山口及甲魯甲爾壟壩

之要路若於此處派兵安設木柵截其糧道不過半月賊人絕糧則山口礮柵可以不攻而得但自格津至嘉資約百餘里中隔雪山兩重此時是否可行現遣弁兵及土弁等前往躡探臣仍飭其上緊料理以期迅速攻克均奏入

諭曰現在翁古爾壘等處隘口節次攻破賊已失其險要且據阿桂奏從此進攻可以直壓僧格宗等語官兵屢經奏捷阿桂等當乘其銳氣徑擣美諾擒縛逆豎以待酬庸渥典又另摺奏現擬派兵正地嘉資山截斷賊人糧道所籌甚是至所稱土兵除明正及革布什咱番民

外均不向前等語士兵隨營征勦惟在善爲駕馭恐音
吉圖未能隨時妥辦汪騰龍到川不久亦未必深悉番
情阿桂當檄令伊等曉諭士兵果能攻奪緊要礪卡必
當報明參贊優叙如實係向前出力雖未得有功績亦
必據實呈報量加獎賞如此則有用士兵益加感奮卽
退後者亦當觀感知改

二十六日

公奏言臣於本月十三日子刻派令侍衛三寶科

瑪守備馬廷隨進至西山之邦甲山梁章京圖欽
保札什守備崔文傑沿溝而上從邦甲山頂繞出

賊後合兵攻擊至巳時將邦甲山梁石城大礮及各石卡奪取遊擊谷生安沿河進攻策爾丹色木之喇嘛寺而已克邦甲之兵向下夾攻賊衆潰逃官兵追殺頭人一名將策爾丹色木喇嘛寺奪取札什馬廷隨復進取公喀爾將山頂後面之德公寨礮房一併攻克維時臣已令明正土兵預備皮船卽派守備鄂輝九齡等帶領川楚兵丁督同巴旺布拉克底土兵渡河直攻東山梁下拉宗礮寨將山梁大戰礮並山溝內及山坡上各礮房攻取又進至拉約焚燒七寨番人跪懇投降而翁古爾

壘之前尙有高峯賊人據以窺伺今因後路將斷亦於是晚越山潛遁統計東西兩面山梁攻克礪卡寨房三百餘間土守備阿忠保又於是日進攻西山梁後之登藏寨而東山梁官兵復與明正土兵督率拉約投降番人攻至宅壘焚燒寨落宅壘番人亦求投順計此二寨男女老幼約二百餘戶精壯番丁二百餘人伏查僧格宗一帶爲小金川西南門戶田地稍饒是以戶口最多礪寨亦最稠密此次番人接踵乞降則小金川人心潰散情形可見臣屢奉

諭旨以番衆投降卽予撫輯現獲活口供稱頭人有私投
出去總爲官兵所殺之語藉此愚弄挾制若使番
衆知拒守必加駢戮投順卽予生全自當更爲解
體但番情詭譎未可深信隨將拉約宅壘兩處婦
女老幼酌派明正及巴旺布拉克底土兵看守外
其精壯番丁卽令各土兵分隊管束隨營行走以
便防制至西山梁之後處處與金川接壤經臣派
兵分布防範並拆毀攻得各處礮寨使其不得乘
間佔據再此次攻得西山邦甲等處擒獲活口內
雅瑪一名年已五十餘懇求將此一帶番衆招撫

附錄
投降現在帶同攻勦奏入

諭曰據阿桂奏攻克東西山梁之邦甲拉宗等寨拉約宅壘番人望風投順覽奏深爲嘉悅阿桂董率有方在事官兵疊著勞績均著交部議叙

又

諭曰阿桂攻克邦甲拉宗等處情形一切籌畫調度深合機宜惟處置降人一節最爲此時緊要關鍵殺降本非行軍所宜且恐番人因此生變轉以堅其固守之志所有拉約宅壘老幼婦女自應宣諭安撫俾獲寧居其中丁壯可用者察其心無反覆隨營驅遣既可資其嚮導

且使傳述中朝撫輯降衆之恩俾爲賊拒守之人望風解體實爲事半功倍阿桂所辦甚屬妥協西路此際已直取明郭宗遇有投誠乞降者溫福等卽當仿此辦理至阿桂奏到擒獲賊番噶勒丹彭等訊有金川頭人帶兵防守美諾之供可見索諾木力爲謀王欲於僧格桑敗亡之後併吞其地是兩酋必須一鼓勦擒更無疑義且摺內所稱西山梁後處處與金川接壤則現在攻勦助逆之兵卽爲摧折索諾木羽翼之要策固不待收得美諾時始圖另起爐竈也將此並諭溫福等知之

公又奏言汗牛地方南接明正東接木坪西接索

布大寨及仲農卡了札哇窠達烏等處西北卽通
美諾但自明正之索布進兵程途頗遠卽由木坪
前往亦復不近現在大營兵力不便更分一路且
另設臺站夫役亦難猝就臣一過僧格宗則汗牛
與美諾之路已斷或勦或撫自當易於籌辦奏入
上嘉之

十二月初三日

公奏言自邦甲前抵納圖納札木一帶其中有都
恭一處臣令明亮督令官兵於十一月十七日分
爲三路並進章京圖欽保遊擊谷生安等攻得山

坡碉卡侍衛德赫布千總劉世勲等由山梁直攻石城金川賊衆悉力拒守我兵三面合圍並壘石卡逼賊是夜亥刻賊皆棄城奔竄至十八日併將日木則扎爾瑪等一帶碉寨百餘處亦俱奪取其都恭山梁以下之拉咱寨經守備劉倬崔文傑攻取都恭以上之丹扎地方亦經劉世勲攻取明亮永平等復攻得噶察丹嘉碉寨其東山一面經章京拉布東阿守備鄂輝李植善帶兵順河進取茨寨榮寨等處前後共收獲降番六百餘口攻得碉寨七百餘間佔據山梁三道至僧格宗相去數十

里尙隔一河其官寨在於峯巒特起之處四面峭
削僅有螺旋細路臣密令拉布東阿李植善隔河
察看情形與巴旺布拉克底頭人雍忠爾結等定
議十九日亥刻用皮船過河分爲兩路潛至礮房
下而西面之劉倬崔文傑亦帶兵壓至僧格宗官
寨後一面攻擊一面繞截去路賊人始猶力拒及
見我兵將次合圍卽拆毀寨後石牆順河逃逸遂
將大戰礮一座及平房小礮百五十餘間克獲臣
俟明亮等所帶官兵齊抵僧格宗酌量畱防後路
一面直攻美諾奏入

諭曰僧格宗距美諾不遠係小金川險要門戶賊人負隅拒守甚堅阿桂殫心籌畫將士用命奮勇爭先連日攻克要隘復乘其不備黑夜分路潛師襲擊賊人棄險驚逃乘勝克捷覽奏深爲嘉悅阿桂及在事將弁兵練並著交部從優議叙

又

諭曰僧格宗係賊巢門戶地勢極爲陡險今我兵於黑夜突入毀礮殲賊從此直擄美諾小金川之事自當尅日告蒞皆由阿桂籌畫調度悉合機宜是以陷銳摧堅要塞應手而得著賞御用黑狐冠以示獎異所有應行優

叙之將弁兵練阿桂可查明功績等次咨部辦理其所
奏進取價格宗時巴旺布拉克底頭人雍忠爾結等與
我軍定議前進頗見誠心効力並交阿桂酌加賞賚

公又奏言查果洲山後係四月間叅將薛琮等失
事之地茲經官兵攻得察看山巖河灘之上尙有
前此陣亡官兵骸骨當令通行埋葬並令總兵英
泰王萬邦前往祭奠奏入

諭曰是當爲其塚如葉爾羌之例祀薛琮等

公又奏言南路由章谷起東面山後卽係小金川
汗牛地方計長百數十里皆與賊界相近必須雷

兵防守而翁古爾壘至僧格宗六十餘里其中納
圍納扎木等處係通金川大路防守亦屬緊要現
在南路打仗之兵不過數千因於達烏等處守兵
內酌量撤出並遵

旨將無關要隘地方兵丁添爲勦擊之用至綽斯甲布革
布什咱兩路之兵原爲牽制金川賊勢今臣攻克
僧格宗正進攻美諾之時舒常前奏添兵一節勢
不能行候小金川事竣再將合勦金川之事籌畫
辦理奏入

諭曰西南兩路官兵深入正直需兵緊要之時斷無分此

要路之兵而攻不能入之地朕屢經降旨令舒常相機辦理今阿桂奏到情節均與朕旨符合不但現在形勢如此卽擒獲僧格桑後接辦金川亦祇須溫福一路阿桂一路豐昇額一路舒常則令其助豐昇額進兵足矣著傳諭阿桂善爲籌畫速抵美諾縛取逆酋舒常但以分賊兵勢爲要著切勿冒險輕進致有損傷再次官兵攻取僧格宗拉布東阿李植善尤爲出衆應否陞級賞給巴圖魯名號著阿桂查明具奏其餘各員並著一體查奏

公又奏言據章京拉布東阿守備鄂輝報稱十一

月十六日有小金川賊番搶奪拉約等寨經降番
雅瑪率衆擊退雅瑪帶有鎗傷等語又是日至十
九日有喇嘛番民等攜帶大小男女三百餘口陸
續來投臣逐一詢問多係舊時卡了約咱黑壘一
帶之人據稱僧格宗已往布朗郭宗念大經合頭
人七圖安堵爾畱守美諾又聞金川派出頭人阿
木克爾鄂思嘉達爾日阿桑及德幹爾額格色木
五人帶兵十餘往納園納扎木一帶據守索諾木
又有搶回伊姊恐僧格桑跟去之語查自達烏至
僧格宗順河直進計程六十餘里若從山上繞行

即有七八十里之遠仰蒙

皇上威福番民懾我軍聲節次投順其年力精壯者仍分
隸屯土各隊帶領打仗其餘老幼婦女卽令各歸
舊寨擇其中年老衆所信服者作爲寨首暫行管
束奏入報

聞

初十日

公奏言官兵從翁古爾壘進剿番人陸續來投又
聞宥以不死投誠益衆統計河東河西兩岸碉寨
相望人口幾及千餘但係老弱婦女居多其精壯

番丁不及十之二三據供僧格桑前日到布朗郭宗今又回來且云若守不住美諾卽退至帛噶角克若再守不住卽退守底木達布朗郭宗至納圍納扎木等處皆有金川人拒守今於彭魯爾寨山梁修起木城有頭人七圖安堵爾在彼居住等語臣仍照前籌辦所放寨首照屯弁之例給與執照金頂以資管束奏入

上嘉之

公又奏言據千總劉世勲土守備阿忠保等帶領屯兵攻取卓克寨明亮帶同章京扎什遊擊郝壯

猷都司許世亨分兵三路進攻古魯賊番分爲兩
路由山梁下來衝突官兵先將中路賊番擊敗逃
回死守其右山梁之賊欲圍官兵所佔石卡許世
亨督兵奮力迎擊短接七八次又派陝兵二百餘
名前往夾擊賊始潰逃遂將古魯地方攻克又章
京拉布東阿守備李植善收服鳩寨瑪爾里塞番
民八十餘戶日古魯塞番民四十餘戶明亮收服
僧木則等寨番民百四十餘口其布隆喀咱他克
撒瑪爾里木巴里各碉寨亦均陸續來投查自策
爾丹色木至僧格宗其中如噶察等處山崖峻削

偏橋皆爲賊番焚毀必須修理以利餽運其由達
烏至僧格宗據侍郎劉秉恬察看應設糧臺二處
亦經派員撥夫安設現在橋座糧臺漸已辦就竊
思西山梁一帶惟納圍納札木二處尙有遺孽其
地在僧格宗西北若俟盡數掃除恐延時日自應
先搆腹心迅攻美諾惟是西面山梁攻得各處均
須畱兵分駐現派副都統舒經安駐扎翁古爾壘
總兵英泰駐扎僧格宗其納木覺爾宗溝口係通
納圍納札木大路令總兵伊常阿駐扎而僧木則一
帶尤爲緊要除派撥章京備弁等分防各隘口外

並令副都統永平統領駐守臣分布之餘所存漢土官兵共七千名察看東西兩岸情形卽日調撥各隊親督前進奏入

諭曰阿桂督率官兵不日攻取賊巢克建大勳自有酬庸之典此時且不必交部議敘惟此次打仗官兵有出色効力者著卽查明咨部分別議敘現在南路已破僧格宗乘勢直抵美諾查閱番人供詞有僧格桑到布朗郭宗今又回美諾之語逆曾當此軍威逼近豈肯安坐受縛蓋由平日禁錮其父甚且悖叛跳梁罪惡貫盈天奪其魄致令株守美諾官兵得搗穴擒渠第該番所供有

美諾若破卽退守帛噶爾角克再退守底木達我兵尤當設法遮防偵其所向躡跡窮追務擒僧格桑以完小金川之局方可接辦金川若徒得美諾空寨則小金川一役亦未可云告蕪也再如除夕元旦等佳節人情於此時必稍疎懈恐賊番窺揣及此潛伺官軍劫營滋事不可不慎重周防令狡計無從施展我兵於此等日尤當乘其不備相機剿戮自更易於奏功著傳諭兩路大營加意辦理

十三日

諭曰西南兩路軍營音信已通自此會兵會剿平定小金

川之後卽應移師金川殲厥渠魁以杜邊陲後患此時
兵糧充裕應分三路進發用壯軍威溫福著授爲定邊
將軍阿桂豐昇額均授爲副將軍其將軍及副將軍之
印著派侍郎福康安馳驛賫送卽以領隊大臣畱駐軍
營溫福一路著舒常爲參贊大臣阿桂一路著海蘭察
爲參贊大臣哈國興雖係綠營漢員於領兵征剿之事
曾經練習且原在乾清門侍衛上行走與滿洲大臣無
異豐昇額一路卽著哈國興爲參贊大臣分道並進恭
行天討以期迅奏膚功蠻氛永靖

十七日

公奏言僧格宗東岸山脚直插河流必須由西岸
前至科多地方搭橋再過東岸方能前抵美諾先
經派出弁員搭成橋座臣於十二月初四日子刻
派德赫布三寶章京拉布東阿扎什都司劉倬守
備李植善帶兵作爲前隊由河東進發又令章京
圖欽保扎勒桑侍衛科瑪遊擊谷生炎帶兵作爲
二隊並派明亮齊里克齊繼進均由河西科多過
橋至河東進攻此一路均極峭仄且被賊番割斷
行走甚爲艱險官兵奮迅直前進至喀咱木籠山
梁又進至奢壘山梁初五日丑刻分兵三路進取

池木官兵奮勇衝突賊不能支遁往美諾計奪得
礪房三十餘間官兵追至美都喇嘛寺後佔據山
梁距美諾不過三四里但美都喇嘛寺在美諾之
後形勢較高現在賊人悉眾屯聚若佔據此寺則
賊寨易於攻取其賊寨之前河上橋座各薩穆果
穆爲通金川功噶爾拉要路據守此津亦可絕其
逋逃之路臣已派侍衛章京將領等迅速前進奏
入

上嘉之

公又奏言本月初五日明亮德赫布等帶兵至美

都喇嘛寺山梁之上望見美諾官寨堅固異常而賊寨以西薩穆果穆橋兩旁礮座亦均有賊番預備抵禦與賊寨互相犄角明亮等察看情形卽乘勝分兵直攻美都喇嘛寺據高壓下德赫布等從山梁衝壓和隆武等沿河岸進攻金川賊番約計三四百人前來救援官兵上前勦擊賊番捨死迎敵潰而復合數次至力不能支始行潰敗官兵分投追趕上下山坡共殺死八九十人餘衆遁入賊寨據守其寺內尙有賊番官兵衝入趕殺盡皆殲戮將喇嘛寺佔據官兵旣得此寺進逼美諾官寨

寨內放鎗抵禦甚急而橋旁礮內賊番所放之鎗又皆一一可及官寨牆根與寨內合力拒守而官寨對岸卽係彭魯爾八寨賊番又隔河排鎗擊打以爲賊寨及橋旁各礮應援惟時已屆戌刻卽派官兵拏卡圍截守至四更察看賊番鎗勢稍懈明亮和隆武三寶德赫布等由寺分路進攻賊番一面放鎗抵禦一面捨死衝出官兵乘夜邀截追趕殺賊更多其橋旁礮內之賊亦俱棄礮遁去初六日寅刻已將美諾各礮寨全行攻取並擒獲喇嘛及男婦等三十四名明亮等帶兵入寨各處搜查

卽將所拏活口嚴訊僧格桑踪跡據稱初五日南路官兵將上美都寺山梁之前賊曾見勢危急一面留兵拒敵一面帶領小女人及頭人伴當等由寨後坐船過河聽見要逃往布朗郭宗不知真假等語明亮等卽將喇嘛寺官寨封固並派弁兵看守是夜聽見明郭宗一帶鎗礮不絕知西路尙有賊番拒守德赫布旣得官寨之後帶兵數百名前往迎接辰刻途遇溫福豐昇額臣亦已將僧格宗納木覺爾宗一帶防範金川事宜詳悉指示交與總兵英泰伊昌阿於是日移營現與西路官兵均

在美諾駐扎至官兵自連日進攻以來人人奮勉
軍鋒所至無堅不克內惟守備牟天德及土守備
阿忠保得有鎗石傷此外兵丁陣亡者十餘人受
傷者四五十人現在查明咨部查僧格桑罪大惡
極實爲覆載所不容今卽鋌而走險希延殘喘亦
斷無不就擒拏以彰顯戮臣與溫福豐昇額整頓
兵力迅速督兵搜捕如或竟入金川亦卽遵

旨直勦金川並籌辦底木達布朗郭宗一路以爲先掃小
金川之局奏入

諭曰阿桂統率官兵由達烏踰險進攻連奏克捷卽於一

月之中直擣美諾雖僧格桑暫時鼠竄勢如釜底遊魂
不日卽可就獲而賊巢已破我武惟揚阿桂調度有方
懋著勞績著交部從優議叙其在事出力之將弁兵練
並著阿桂查明咨部一併從優議叙

公又奏言竊查兩金川逆酋罪惡貫盈神人共憤
我

皇上義征不諱上協

天心不獨各省豐收卽川省秋成比較往年加倍且成都
向少冬雪茲者亦報祥霽將見明歲豐收於茲可
卜而西南徼外往時雨雪最多者今則仲冬以來

風日極爲晴朗軍士行走進攻非獨無虞凍滑抑
且不患祁寒似此

天助麻嘉悉賴

聖明福庇則乘勝進兵掃靖小金川後並攻金川逆豎自
必易於殲事奏入

諭曰實堪欣慰亦爾等忠勇所感也勉之

二十日

公奏言美諾爲小金川適中四達之地雖經攻取
而美諾以西之彭魯爾八寨尙爲賊守迤北之別
斯滿亦未投順其餘附近各礮寨均需招撫且自

美諾經由崇德牛廠前往卽係乾隆十二三年進
攻金川喀爾薩爾一路距金川邊界不遠亦宜稍
爲布置况南路官兵在僧格宗所支口糧業經用
竣因道路崎嶇糧運未到亦俟裹帶有資方能進
發今彭魯爾八寨番人已就招撫而附近之明郭
宗之達伊寨達克蘇寨噶沙里寨尼雅布角寨並
別斯滿五寨中之兩寨悉已撫定此路軍糧又經
侍郎劉秉恬前來美諾趕辦米石足敷支給臣酌
畱官兵駐扎防範外卽於十一日起程前赴布朗
郭宗查溫福豐昇額兩路並進所帶官兵數目雖

屬相仿而豐昇額一路與金川隘口相通必須官兵續進更足以壯軍威而寒賊膽臣是以從達巴溝分路卽由豐昇額一路帶兵續進再納圍納扎木等處前此尙有金川賊番負固據守現據副都統永平報稱賊衆自焚碉寨退守已界臣仍飭永平等小心防範不致疎虞

公又奏言小金川所屬地方汗牛最大東界木坪南通明正其北直抵美諾計長二百餘里中如榮榮等處形勢險絕卽在卡了達烏之後前於明正土司甲爾參得沁來營時經臣諭令設法招撫今

據稟稱十一月二十九日入汗牛地界將

大皇帝好生德意廣爲宣布其第一寨番民卽已叩頭悅服至十二月初五等日汗牛等十四寨均經投順

臣卽令甲爾參得沁派出頭人暫爲管束均奏入

諭曰阿桂奏籌辦美諾稍畢卽於十一日起程前往布朗郭宗所辦甚是與昨溫福等所奏卽由美諾前進追捕逆豎其遲速前後俱合機宜至所奏撫定彭魯爾等寨極爲妥協汗牛一帶業遣明正土司招撫更足慰懷該土司甲爾參得沁卽著阿桂傳旨嘉獎俾其益知鼓勵惟據圖內地形別斯滿賊寨均在美美卡之北爲西路

應防後路其距美諾較遠因何得以併爲撫定或係舊圖方向未確著阿桂補繪呈覽又所奏豐昇額一路必須官兵續進是以從達巴溝分路帶兵繼進一節所辦亦是再溫福等昨奏於達巴溝山梁派員駐守因其地關係緊要曾諭阿桂添派多兵並令選派領隊大臣前往今阿桂既由達巴溝分路進兵則此一帶形勢皆所目擊尤應善爲籌辦以期於事有益至金川賊衆焚礮而遁自必退守巢穴官兵既掃清美諾卽日可勦金川如噶拉依勒烏圍等處雖向係險隘諒亦與西路之路頂宗至明郭宗南路之翁古爾壘至僧格宗形勢相仿

温福等惟當堅持定見勦平金川擒縛索諾木方爲盡善

恭錄

御製詩

定邊將軍大學士温福奏報攻克布朗郭宗賊僧僧
格桑竄入金川整兵進勦小金川全平詩以誌事序有
小金川逆僧僧格桑恃與金川逆僧索諾木狼狽爲
奸陸梁抗命索諾木潛爲黨惡助兵代其拒守因命
大學士温福爲將軍尙書公豐昇額副之統兵攻其
西路而南路則以內大臣阿桂爲副將軍督兵並進

所在山徑險仄賊得逞其負隅之計西自資哩美美
卡路頂宗至明郭宗南自達烏甲爾木翁古爾壘至
僧格宗皆峭壁懸崖礮卡林立將軍等董飭官軍勵
勇奮擊我領隊大臣侍衛並率衆先登始以大礮摧
其堅繼乃覓間入其阻每克一寨皆久經攻戰而後
得其難如此及阿桂既克僧格宗乘勝直入徑搆美
諾賊巢逆酋先期遁去會溫福亦攻克明郭宗至美
諾兩軍相合溫福等仍督兵窮追徑取布朗郭宗逆
酋復由僻徑竄入金川遂收底木達擒其父澤旺因
而招徠汗牛撫降別斯滿諸寨其大板昭亦傳檄而

定小金川悉平時軍營奏至謂番境界在雪山之中
茲值隆冬乃晴暖無冰雪衆以爲異此實賴

上蒼眷佑將士等得以利便集事第其經涉艱險破礮奪
隘諸勞績則不可以無紀今大軍進剿金川所當掃
蕩竄穴繫縛二酋以告歲事而

天之助順人之用命尤予所切望而深勗者候大勲成當
仿平定西陲例凡戰地悉爲繪圖武成殿壁圖系以
詩此誌事之什特爲先聲之倡耳

美諾賊巢失

先是阿柱於月初六日由南路督兵乘勝
直搗美諾寨賊巢遂破逆酋僧格桑先於初

五日見勢危急挾妾潛竄伊妻
所居之布朗郭宗爲死守計

布朗讀如

挈眷遷窮追期

卽獲温福與豐昇額既由西路統兵與阿桂會於美諾初九日卽由帛噶爾角克分兵進剿直抵布朗郭宗四面截攻賊寨驚潰而僧格桑知勢不支先將妻妾潛送金川自赴底木達欲見伊父土司澤旺閉門力拒僧格桑竟殺伊父所遣傳語之人自由美臥溝小路翻山竄入金川温福等因撫定各寨人戶擒澤旺解京一面尾追僧格桑勿令免脫復遁本相連任爾狼狽顧那容駭喙延小金之事藏黨惡問金川

二十七日

公偕温福豐昇額奏言金川賊巢惟噶拉依及勒烏圍爲心腹之地其由功噶爾拉進攻喀爾薩爾係擣噶拉依正路臣温福由此一路進剿其自僧格宗經納圍納扎木至當噶爾拉進攻亦係進攻

噶拉依要路臣阿桂由此一路進剿至舒常現由
綽斯甲布進兵其俄坡地方係徑攻勒烏圍近路
最爲得力前此僅有漢土兵八千名今於臣溫福
並董天弼所帶兵內酌撥漢兵四千土兵二千臣
豐昇額帶兵由章谷吉地前赴綽斯甲布合該處
現有之兵並與舒常合力攻剿奏入

上嘉之

公又奏言現在分兵三路並酌撤會頭溝一路官
兵以一半撥添綽斯甲布一半撥添功噶爾拉聲
勢已爲壯盛即臣所進當噶爾拉一路現有官兵

萬餘除沙汰傷病外尙可敷用惟是分路輓輸糧

運不無拮据臣三次到川於西南一帶道路遠近

險易畧知梗概凡有便於輓運及可稍爲節省者

均告知侍郎鄂寶劉秉恬就現在局勢釐定章程

盡心經理臣卽於十二月十七日由布朗郭宗起

程回至美諾僧格宗一帶亟整兵力迅速進攻以

爲併縛兩酋之計至臣在南路時綽斯甲布土司

屢遣頭人請安稟話臣隨時駕馭察其頭人頗爲

信悅將來進剿似可期其出力已將該處道路形

勢及土司番衆性情並從前節次籌辦緣由逐一

告知豐昇額俾得酌量辦理奏入

上嘉之

三十八年癸巳五十七歲

正月初五日

公奏言十二月二十一日據音吉圖汪騰龍等報稱職等每日令將備上南山梁察看賊踪十七日酉刻見山下樹木內火起賊番紛紛潰散當卽統兵過河乘勢分攻山口左右賊番俱各望風奔逸共計佔得大礮柵六座木柵二十三座石卡六處殲賊五名等語二十二日又報稱職等攻得正地

溝口碉柵普濟保帶兵卽赴甲爾壘壩行至中途
有綽斯甲布頭人安布差人迎稟已得甲爾壘壩
馳往查勘其地有碉六座現經綽斯甲布土兵佔
據稱工噶諾爾布派我帶兵千名來此賊番見我
勢衆卽便散去又離此六七十里之協雅地方有
碉三座我頭人生根亦已攻克等語臣思革布什
咱一路原與綽斯甲布官兵共綴金川賊勢今旣
攻得正地溝口甲爾壘壩卽已控扼金川要隘其
餘革布什咱各處防兵均可量爲裁撤以資進剿
業經飭令音吉圖等察看情形先行籌辦此內德

爾格式等處馬上番民素不長於步行越險進剿不能得力自應一併撤歸遊牧以節糜費並可備運糧烏拉之用惟查巴旺布拉克底之馬奈馬爾邦亦係乾隆十二三年進兵之路該處路通金川應卽於革布什咱官兵內酌撥千名以供駐守其餘官兵或可酌分當噶爾拉綽斯甲布兩路統俟議定再行具奏再查逆酋詭詐百出或因甲爾壘壩距巢穴稍遠守禦較難陽爲退地乞憐其實撤聚賊衆另踞險要亦未可知臣仰賴

天威惟有矢志掃除內孽此等伎倆斷不爲其所惑亦已

告知豐昇額囑其前往該處駕馭綽斯甲布土司
使知大兵必滅金川庶該土司等不以退地而心
生觀望

公又奏言查別斯滿地方共有五寨其二寨先經
撫定此外三寨有兩金川賊人監守是以衆番等
未敢遽投嗣臣即令已投之二寨番民前往招撫
該番民等遂與監守賊番接仗其未投之三寨番
民從中接應殺死監守賊番並據該番等稱我等
看見雜谷百姓自改作屯練以來各安生理土司
不敢欺凌今歸順

天朝不願分給各土司只求改作屯練等語臣查別斯

滿原係另一土舍其地在鄂克什三襍谷小金川之間與維州協所屬屯練界址相聯十三年小金川事竣後岳鍾琪任意辦理將該土舍地方徑行賞給小金川小金川因非同類派累獨重現在該處精壯番民多被逆僧派出打仗陣亡僅存老幼婦女五百名口是以該番等心存畏懼不願分給土司所請改爲屯練之處實出真情臣等現已准行檄調五福查禮前來經理至汗牛十四寨先已歸順茲據原往招撫之明正土司甲爾參得沁親帶

十四寨頭人來營報稱各寨內共有三百七十一
戶老幼婦女一千九百四十餘名口臣亦面爲曉
諭令其派精壯者隨征復酌賞頂戴紬布等物該
頭人等極爲感悅仍令明正土司赴彼彈壓將來
統歸五福查禮接辦

公又奏言臣欽奉

諭旨土弁雍中爾結色勒奔著賞巴圖魯名號仍加守備
頂戴獎賞花翎查巴旺與布拉克底本屬一家巴
旺係土司其布拉克底乃係土舍向來未經領受
印信號紙此次隨征小金川極爲出力並懇將來

授以土司之職臣伏思川省西南邊外各土司形勢必宜衆建而分其力擬於軍務竣後酌量奏請是以前次仰荷

聖旨賞給該土舍花翎

臣

因其未有頂戴酌照土都司例

給與空頂以示鼓勵第土舍甫有空頂花翎而土弁亦卽賞戴花翎恐番人等不知分量稍生滿足之心轉懈奮勇之志臣現將加銜賞號

諭旨先爲宣示所賞花翎察其此後出力如何再爲請旨均奏入

諭曰阿桂奏攻得正地甲爾壘壩一帶可以控扼金川要

隆慶元年詔
卷一
陰留兵防守亦爲要務阿桂業已洞悉形勢自能妥辦
又另摺奏別斯滿五寨降番改作屯練既出伊等情願
事屬可行餘仍遵照節次所降密旨籌辦又另摺奏土
弁不宜卽賞花翎所見亦是應如所議辦理但其中有
尙須斟酌者如溫福一路出力土弁內並無戴翎之人
卽可照此奏留俟伊等奮勉立功再加獎勵設溫福軍
營已有賞翎之人恐不免相形生懈則又不當靳此恩
施著阿桂札詢溫福畫一辦理

公又奏言

臣仰荷

天恩授爲定邊右副將軍並給與印信計福康安抵西路

軍營即可將溫福現用之右副將軍清篆印信移交前來臣所署四川提督印信應交何人相應請旨奏入

諭曰仍交董天弼

初十日

公奏言臣自抵僧格宗後即令土弁土兵前往踏探看得自納木覺爾宗溝口上山約行四十餘里即係納圍納扎木自此向北上山約三十餘里大嶺一道遂與功噶爾拉相聯即係當噶爾拉爲金川界址向年此一帶積雪甚深茲仰叨

皇上福佑冬日晴煦陽坡不過數寸不至有碍進兵惟山勢極峻又堅礮十四座排列兩峯了口間守禦甚爲嚴密一得此嶺則金川各處皆出其下但嶺下險坡有林箐二十里冰雪頗大再進卽金川之克舟九寨等處稍稍寬廠查僧格宗河東河西地方及汗牛十四寨雖均投順究係新經撫定而此一帶通金川之路又多且僧格宗納木覺爾宗係糧運總匯必須大員經理畱兵防範臣合總兵張玉琦駐彼一切轉運遞送事宜均歸管理以重責成並合成都副都統舒經安原任副都統鐵保帶領

成都滿兵四百餘名駐納木覺爾宗溝口以資接

應臣帶領漢土兵一萬二千餘人統率前進並知

會劉秉恬催趲軍糧數百石先爲裹帶之需隨即

設站運供期無匱乏臣思此路官兵自破翁古爾

壘以來摧礮殺賊奮勇實倍於常金川賊衆諒已

久經喪膽但前次金川係兼剿而此後係專辦當

移兵之始必須確操成算先得一二勝仗攻取一

二要隘以奪其氣嗣後即可迎刃而解臣察看軍

心均屬踴躍士氣亦覺奮揚實爲私心竊喜今將

屆初春向前日暖綠營兵衆更易展施而賊番春

耕有悞勢難久於支拒奏入報

聞

公又奏言臣等現在分兵三路進剿金川僧格桑雖經喙走而大兵合力奮攻一經掃穴兩酋即可並擒惟是僧格桑逃竄及金川容留情形亦必須偵探籌辦臣近令巴旺布拉克底番人前往密查據伊回稱探得索諾木居住噶拉依其兄喇嘛莎羅奔等皆在勒烏圍僧格桑攜妻室至彼隨行尙有二三百人同往勒烏圍官寨莎羅奔傳集衆頭人商議時有山丹綽爾嘉勒係耶卡手下年老頭

人言

天朝來勦小金川爾等幫同抗拒傷死多人不能估得寸土今又收畱價格桑

天朝必不肯饒此時速行送出庶幾免罪其餘衆頭人言價格桑本屬一家來此投生非來送死如何可以送出莎羅奔從衆畱住又稱索諾木年纔十九印信號紙皆其兄喇嘛等掌管等語臣查耶卡有子五人長二三係前妻所生其索諾木及第五子係後妻所出聞從前耶卡欲以索諾木承襲土司大頭人中有言不應立者置之於死今索諾木雖

現爲土司頭人未必各能悅服以情勢揆之金川
必終歸殄滅臣惟有乘勝進攻速圖蕝事奏入
諭曰今固不敢爲滿足之言若賴

上天慈恩速成此事實千古未有之績也勉之以待酬勲
厚典

二十一日

公偕明亮奏言臣等於初九日統兵至納圍納扎
木察看當噶爾拉形勢與前此弁目等踴探所言
無異惟當噶爾拉以下納圍納扎木以上中間戰
礮一座尙有金川賊番潛伏臣等卽令將弁等前

往衝奪賊見我兵勇銳棄此而逃聚於十四礮內
併力拒守官兵當將此礮拆毀另行擊卡駐守而
十四礮形勢聯絡皆可互相援應礮外又築有石
牆圍繞甚爲堅固查該處本係賊酋緊要門戶其
設備嚴密原屬意中之事此必先用大礮轟摧方
能得濟而臣等軍營所帶礮位食子均在十斤之
內現雖飭將銅斤物料迅速運營以爲鼓鑄之用
而夫役亦尙不敷若俟礮成攻擊恐致稍稽時日
現在熟審機宜總於數日間卽行進取務期殲賊
奪礮庶足以壯士氣而寒賊膽奏入

諭曰阿桂等奏攻剿當噶爾拉所需鑄礮銅斤物料夫役亦尙不敷運送等語現在大兵采入各路夫役在後運供最關緊要著傳諭劉秉恬妥速經理以資要用但所雇夫役向來多有中途脫逃者不可不加意整頓伊等既經受值卽係在官之人並非自用其力若竟敢於逃避以致糧運稽延與玩悞軍務無異卽當查出倡首二人辦理庶足懲一儆百再各處賊礮需礮轟擊者多移運既艱自宜隨地另鑄各路均應多貯銅斤以備將軍調取倘稍有不敷卽將錢局存銅暫行借用亦無不可或將尋常施放未加封號之礮毀棄移運亦較省便

所謂急則治其標也以上諸事劉秉恬卽當實力妥辦
溫福等並宜一體留意

二十八日

諭曰阿桂著補授禮部尙書阿桂未到任之前著索爾訥
署理

二十九日

公偕明亮奏言臣等統領官兵前抵當噶爾拉相
機進取茲於十四五等日風雪連綿至十七日
始行開霽臣等進兵之路本在陽坡雖早晚冰凌
堅滑然於兵丁行走進攻尙無大碍惟是當噶爾

拉山高路峭官兵雖俱踴躍思奮而從納圍納扎
木進抵梁上賊礮尙有二十餘里步步仰攻究不
免於疲頓臣等令各領隊及鎮將等將營卡日逐
上移今距賊礮不過二三里所鑄食十六斤子之
大礮已於十八日造成其三四號礮位亦陸續運
到查賊礮堅固用礮轟摧愈近愈爲得力第旣逼
近賊礮必須建設木城防護庶礮力猛而有準我
兵亦不致多傷但此山並無木材臣等督令官兵
於他處密行砍伐運送並令辦就攜牌火彈等物
卽於二十一二日間分兵三路一面直前進攻於

對敵之前搶立礮棚一面潛師越溝攻奪靠西一帶山梁賊礮務期得手總之當此進兵伊始非卽破礮據地示以懲創不足以寒賊膽臣等惟有督勵漢土官兵奮速進剿

公又偕明亮奏言革布什咱各處防兵本可量爲裁撤前據各將領等酌議具稟臣阿桂復訪詢熟

悉情形之將弁土人詳加籌度除甲爾壟壩本係綽斯甲布之地該酋業已遣兵佔據毋庸另派官兵駐守其甲魯與甲爾壟壩本係一道山梁相去不遠今應派駐兵五百名令其彼此聲援並令駐

守甲爾壟壩之土兵與甲魯之兵每日巡查會哨則聲勢卽爲聯絡仍可牽掣賊人其自吉地前往甲魯丹東綽斯甲布之各隘口及自格藏橋以至吉地丹東一帶臺站亦均視地方之緊要與否以定駐兵之多少共應畱漢兵七百九十名土兵一千名令參將吳錦江郎摺升等分段管理以專責成查革布什咱一路現存川黔陝甘官兵三千八百餘名其各處土兵亦共有三千八百餘名今革布什咱各隘除酌畱防範外所餘各處土兵內其德爾格忒等馬上番民一千八百餘名登山越險

本非所長均應撤歸遊牧以節糜費並可派出烏
拉供運軍糧其餘革布什咱番民尙爲勇健前據
伊頭人派出一千隨營打仗今除分撥三百名留
守甲魯各隘餘令赴當噶爾拉大營聽用其屯練
一百餘名明正嚕密達巴士兵四百名亦俱可用
並令來營聽候調遣至應行撤回之川兵一千五
百餘名查馬奈馬爾邦係乾隆十二三年進剿金
川之路亦係巴旺布拉克底與金川交界之所後
路卽通格藏章谷等處自應設兵駐守以分賊勢
卽於此項川兵內酌派一千名同巴旺布拉克底

土兵四百名令汪騰龍往彼駐扎所餘川兵五百餘名歸入當噶爾拉一路軍營其應撤回之貴州兵四百餘名查係總兵王萬邦所帶數內今當噶爾拉大營僅存六百餘名自應將此四百名一併歸入以便調用至所餘陝甘兵一千一百餘名本係副將常泰等帶領來川之兵今常泰已帶陝甘官兵現駐綽斯甲布此項陝甘兵丁亦應前赴該處軍營併爲一隊且豐昇額等一路現雖有兵一萬五千餘人但丹壩逼近金川該處或應稍添兵力以緩賊勢或新設糧臺須兵防護得有此項官

兵自足以資分撥至臣當噶爾拉一路僅有漢土官兵一萬二千餘名今既增入川黔及屯練革布什咱明正嚕密等土兵一千九百餘名及新降番人八百餘名合之原有進剿之兵已有一萬五千餘名與綽斯甲布一路官兵數目相等於軍營聲勢亦爲有益均奏入

諭曰阿桂等奏進兵伊始非卽破礪奪地示以懲創不足以寒其膽所見甚是官兵勦賊遇應攻擊之時固不宜過於持重稍示怯弱然初次進攻接仗若不審度合宜奮擊得利大挫其鋒不能振我軍威使賊望而生畏今

大礮既已鑄得定於二十一日分兵進攻自可剋期制
勝佇聽捷音又阿桂另摺奏革布什咱一路漢土官兵
除酌留駐守隘口外其各處土兵分別調撤昨因豐昇
額等所攻達爾圖日旁一路賊礮猝難進取因思甲爾
壘壩至正地一帶亦係溫福原定各路進兵之路且稱
其地稍平欲令舒常同音吉圖等帶兵由此前往已傳
諭豐昇額等熟審情形是否可行就近妥酌辦理並著
傳諭溫福阿桂一併詳議其現擬裁撤之革布什咱一
路土兵應否添撥交舒常等備用並著阿桂籌核核辦